

NNEME JESUS YE NICODEMUS

John 3:1-21; 7:45-53; 19:39, 40

QYQHỌ UKPEP-ŊKPỌ 29

Eke Mkparawa

IKỌ IBUOT: “Koro Abasi akamama ererimbot ntem, tutu Enye osio ikpọn-ikpọn Eyen emi Enye obonde ọnọ, man owo ekedede eke ọbuọtde idem ye Enye okutak, edi enyene nsinsi uwem” (John 3:16).

Mbume Nicodemus

Akpa ńkpọ emi Nicodemus eketińde ọnọ Jesus ekedi, “Rabbi, nnyin imọfiok ite Afo edi Andikpep emi Abasi osiode ọdọń; koro baba owo kiet ikemeke ndinam mme idiọńọ emi Afo ananam, ibọhọke Abasi odu ye enye.” Emi ikpekedighe utọ ikọ emi okpokotode owo Pharisee. Mme Pharisee ekedi mme okpono Abasi emi ekedude ke eyo Christ, edi mmọ ema eduok Spirit Abasi anyan ini, ekenyuu ekpono Abasi ke ido ye odunam. Ke ini Jesus edide mmọ ema esin ndinyime Enye nte edisana Eyen Abasi, edi edomo kpukpru ini ndikut ndudue ke Enye, akpan-akpan ke mme ńkpọ emi abañade Ibet.

Nnyin imokut mi ite ke Nicodemus, emi ekedide kiet ke otu mme Pharisee, ama enyene akwa ukpuhọre ye mmọ eken. Enye ama onyime ete ke Abasi ọkọdọń Jesus onyuu onim mme utibe ńkpọ Esie ke akpanikọ, emi okponde akan se ediwak mme aka ufok Abasi mfin enamde.

Nicodemus ekedi etubom ke ido ukpono Abasi mme Jew, emi ekedi ńkpọ mkpaidem ọnọ Jesus ke ini enye mikọfiokke se ikọ edimana obufa ọwọrọde. Ufok Abasi mmọ ama afiak edem ọkpọń Abasi tutu mmọ ifiokke se ọwọrọde owo ndinyene edikabare esit.

Obufa Emana

Ediwak owo mfin edu ke utọ itie emi Nicodemus okodude. Mme owo itimke ifiok ke ini afo etińde ńkpọ abañá erinyańa ukpọń. Mmọ ekere ete ke ima ikabare idi mbon ufok Abasi inyuu idọhọ ite ke imenim Jesus ke akpanikọ, oro edi ńkukure se mmọ enyenede ndinam. Ediwak mme ọkwọrọ-ikọ isikworọke ite ke ana nte mme owo etua mkpọfiok ke abañá mme idiok-ńkpọ mmọ enyuu ekpọń, enyuu ebọń akam tutu Jesus efen ọnọ mmọ. Ekikere ediwak owo esikpu, ke ini enye abuanade ke ufok Abasi ye idorenyin ndinyene ukpuhọre uwem, edi okut ete ke imọ ke isuk ika iso ndińwana ye ukem idiok-ńkpọ emi okodude ke uwem imọ. Ukpuhọre baba kiet inyuu idaha itie.

Ndusuk ekikere Nicodemus ama okpu ńko koro enye okoyomde akpanikọ. Edi mme ńkpọ oro Jesus eketińde ọnọ enye ke abañá edimana obufa ekedi utibe ńkpọ ọnọ enye. Obufa emana edi akamba utibe ńkpọ, ntre Jesus ama ada ini anam ańwana enye. Enye ama ọdọhọ Nicodemus ete ke idighe ke ido obukidem, oro edi, akani owo ikemeke nditọńọ ntak mmana nte nsek eyen, edi ke edi eke Spirit, emi ukpuhọre ekemede ndida itie ke esit owo. “Edieke owo odude ke Christ, ema ebot enye obufa; ńkani ńkpọ ema ebe efep: sese, emekabare edi mbufa” (2 Nwed Corinth 5:17).

Mme Edinam Spirit

Jesus ama ọdọhọ Nicodemus ete, okposuk edi nte enye midikwe ke ini ukpuhọre adade itie, edi ke utom esie eyewut idem ukem nte ofum enyeńede eto. Nnyin iyekut nte mme ikọń esie enyeńede; ndien edieke oyobio etienede, iyekut eto oro owuberede mme okpohode mbai-mbai, edi nnyin ikwe idem ofum. Nnyin imekeme ndikop nte suń-suń ofum eberede nnyin ke ọkpọ-iso; nnyin imekeme ndikut idiok-enyọń nte ebede ke ikpa-enyọń, nte ofum awatde enye asańa; nnyin imekeme ndikut ikpọ mbufut awawa nte ewerede ebe ke ikpọ akpa inyań; edi nnyin ikwe ofum emi anamde mmọ esańa. Nnyin idorike enyin ndikut, kpa ye oro owo ndomo kiet iyikke ete ke ofum do, koro enye mikwe ke enyin.

Mme edinam erinyańa ukpọń edi akpanikọ. Ke ini nnyin ikutde akpa-mmin, emi ama ọkọduok kpukpru ńkpọ oto ke uwem idiok-ńkpọ esie edide editiene Abasi ye erikabaresit, ndien ọtọńọde ke ini oro ikpaha aba mmin, akabare eti owo emi odude eti uwem; nnyin imọfiok ite ke enye amana obufa. Nnyin ikekwe nte Spirit Abasi odukdde edi, me nte andidiok ọwọrọde, edi imekeme ndikut ukpuhọre.

Ekeme ndidi owo oro enyene ufiop-ufiop esit. Onyuu ayat esit kpukpru ini ke ini enye mikemeke ndinyene se enye oyomde. Ke ini enye enyenede erinyańa-ukpọń mme ufan esie eyekut ete ke enye idighe owo iyat esit aba, inyuu idighe owo utok. Oro edi mme edinam obufa emana, ukem nte emi ofum owuberede eto oduok.

Ke adańemi idiok owo etienede Jesus ye mfuhọ ido Abasi ke abañá mme idiok-ńkpọ esie, onyuu ebeńede erifen, ndien Jesus efen ọnọ enye; enye amana obufa. Mme udọń idiok-ńkpọ eyekpọń enye, ndien Abasi eyenọ enye unen ndidu uwem unana idiok-ńkpọ. Ke ini Jesus ọnọde nnyin ewuhọ, Enye ọnọ nnyin odudu ndinam enye.

Ke ini Enye ọkọkọkde owo mbuño ke mben Mmọn Bethesda, Enye ama ọdọhọ enye ete men mkpana fo nnyuñ saña. Imokot ke Edisana n̄wed Abasi nte ke owo oro ama emen mkpana esie onyũñ asaña; oro ọwọrọ ete ke Christ ama ọnọ enye ukeme ndinam ntre. Ke ini efen Jesus ọtọnọ ntak osobo ye enye ke Itie-ukpono-Abasi, onyũñ ọdọhọ enye ete okunam aba idiok-ńkpọ man se idiokde ikan oro edisim enye. Nnyin imokut ite ke Jesus okoyom enye anam item oro ńko.

Mme ńkpọ emi Ọbọn eketiinde ama otuk esit Nicodemus eti-eti; koro ke akade iso ke ini akwa oku ye mme Pharisee ekedomode ndimum Jesus man ewot enye, Nicodemus ama etiñ ndinyaña Enye ete; “Nte ibet nnyin ebieri ikpe owo, ke ini mikopke kaña uyo esie, minyũñ ifiokke se enye anamde?” Mme oku etiñ ikọ esuene edian enye, edi enye ikereke koro enye ama ọfiok ete Jesus edi edinen, ńko, enye okoyom ndikut nte ekpede unen. Ke ema ekekọn Jesus ke Krọs, edi enye Nicodemus emi akada mbuaha myrrh ye aloes ediñwam ke nditim n̄wañ okpo Jesus ke ọfọn linen ye mme enem utebe aran (John 19:39, 40).

Ema Esin Uñwana

Mme Jew kpukpru ini ekesima ndineni mbaña ńkpri ńkpọ; edi etre ndifiok ete ke mme imọ ke inam oburọbut idiok-ńkpọ. Jesus ama abat mmọ adian ke ini Enye ọkọdọhọde ete ke uñwana ama oduk ke ofuri ererimbot, edi sia utom mmọ ediokde, mmọ emek ekim. Iduhe mmọ emi edide nnan nte mmọ emi miyomke ndikut usuñ. Jesus ekedi uñwana ererimbot, ayama ke kpukpru uyai Esie ke Spirit ke iso mmọ; edi koro utom mmọ ediokde, mmọ esua enye.

Ke eyo Jeremiah, Abasi ama etiñ abaña mme ndik-ndik idiok-ńkpọ emi akadade itie ke isọn onyũñ ọdọhọ ete, “Ikọt mi enyũñ ema ntre.” Enyene ndik adaña didie ndikut mme owo ekotde idem mmọ mme anditiene Jesus edi ema idiok-ńkpọ! Kere baña utọ ubierikpe emi Abasi edidade etiene mmọ emi Enye anamde ediwak ńkpọ ọnọ mmọ edi mmọ esuk eka iso ke idiok “enyũñ ema ntre!”

“Akamama Ererimbot Ntem”

Owo kiet ekededi emi ọfiokde ńkpọ abaña Edisana N̄wed Abasi ekeme ndisiak John 3:16. Ikọ Abasi ke ufañ oro ekem nte akpanyañade ofuri ererimbot edieke mme owo ekpenamde uyo esie.

“Koro Abasi akamama ererimbot. . .” Akanam emetie ekere adaña nte Abasi amade nnyin? Nnyin ima mme owo emi emade nnyin, edi nte nnyin imekeme ndima mme asua nnyin nte Abasi akanamde? Ke ini nditọ Israel, ndimek ikọt Abasi, ekewọnọrede ekpọn Abasi enyũñ enam oburobut idiok-ńkpọ, Enye ama ọdọhọ ete, “Mmama fi nsinsi ima: mmọdo mfonde ido ye afo mbighi” (Jeremiah 31:3).

Abasi akamama nnyin eti-eti esin Enye osio ikpọn-ikpọn eyen Esie ọnọ ete akpa ọnọ nnyin emi idide mme idiok owo; ńko Jesus onyũñ ama nnyin eti-eti ndikpọn ediye Ebiet Iduñ Esie ke Heaven emi kpukpru angel etorode Enye, ndidi ke isọn ndiduñ ye mme idiok owo emi ekesuade enye. Enye ama ọfiok ńko ete ke Imọ inyene ndikpa idiok mkpa ke krọs man isio isop idiok-ńkpọ inọ ubon owo. “Edi Abasi otim ayarade ima eke amade nnyin, ke emi Christ akpade ke ibuo nnyin ke adañemi nnyin isuk idide mme idiok owo kaña” (N̄wed Mbon Rome 5:8).

Jesus ama ọdọhọ mbet Esie ini kiet ete, “Baba owo kiet inyeneke ima eke okponde akan enye emi, owo ndikpayak uwem esie nduok ke abaña mme ufan esie.” Edi nnyin ikedi mme asua Abasi, mme idiok owo emi mikanamke ibet Esie ke ini Christ ekedide edikpa nnọ nnyin. Se, utọ utibe ima emi!

Ke akpa N̄wed John, enye etiñ ke ediwak itie ọnọ nnyin abaña ima Abasi: “Ese utọ akwa ima emi Ete ọkọnọde nnyin, ete nnyin ikpekere nditọ Abasi” (1 John 3:1). Ke ini ima ikabare idi nditọ Abasi nnyin idi mme enyene udeme ye Christ ke nsinsi ubọn (N̄wed Mbon Rome 8:17).

Ke adañemi ibode erinyaña ukpọn, Abasi esin ima Esie ke esit nnyin. Ke N̄wed Mbon Galatia 5:22, 23 imokot ibaña mme mfri Spirit, ndien ima edi akpa ńkpọ emi esiakde. Koro ima oro odude ke nnyin, nnyin imekeme ndidi uñwana ke ererimbot, ke ndiwut ima Abasi. Kpukpru mfri Spirit edi akpan ńkpọ edieke nnyin iyomde ndiyama nnọ Jesus: “Ima, ye idaresit, ye emem, ye ime, ye mfọn-ido, ye eti ido, ye erinam akpanikọ, ye ifure-ifure ido, ye mfara ke idem.” Eren, n̄wan mme ekpři eyen eke osioñode mme mfri emi, odu ata ediye uwem owo Abasi, ndien “inamke Jesus but ndikot mmọ nditọ ete.”

MME MBUME

- 1 Nte Jesus ama otim anam añwaña Nicodemus se obufa emana ọwọrọde?
- 2 Nso ke Nicodemus akanam ke abaña edibuk Christ?
- 3 Nso ke inyene ndinam man idot ndika Obio Ubọn Abasi?
- 4 Siak mme “mfri” emi odude ke uwem owo emi amanade obufa?
- 5 Kere mbuk urukikọt emi ekemenereke ke enyọn ke Akai-ikọt (Wilderness).